

გოდუძა

№4, 2017



ვიზრდები და ვძლიერობ

ბაბუს ფესვის ყლორტი ვარ,
 ძლიერი ვარ... მოვდივარ...
 დღეო, ახალთახალო,
 უნდა მზარდო, მახარო...
 მე კი ჩემს გულს გაჩუქებ,
 სულს მზედ გამოვაშუქებ...
 ვივლი ცისკენ უფლის გზით,
 ჩემი ჯვარით, ურბნისით,
 ვარ მდიდარი, ამაყი
 ამ მთითა და ამ ბაღით.
 უძველესით, განთქმულით –
 ჩემი ენით, ქართულით;
 ამ ლურჯი ცით, საოცრით,
 ჩემი „ვეფხისტყაოსნით“ –
 ვიზრდები და ვძლიერობ
 ქვეყნის საბედნიეროდ.



ქათი კვიტატინი

პეპელა


პეპლის ფრთაზე ეს რა ბრწყინავს?
 რა და, ნვიმის ნამი.
 პეპლის ფრთაზე ეს ვის სძინავს?
 – ობობაა ღამის.
 ჭრელაჭრულა ფრთებზე სხედან
 ბუზი, ხოჭო, ჭია...
 ისე მოსწონთ მორბის ყველა
 ციყვი თუ ბაჭია.

ერთ დღეს ცოცხლობ,
 ცოდო ხარო, –
 არც კი კრთება ძახილზე.
 სულ სიკეთე აკეთა
 იმ ერთი დღის მანძილზე.

კ ა ე შ ც ო

პეპლები ყველაზე ღამაზი, ჭრელი მწერებია.
 მათი უმრავლესობა მართლაც სულ რამდენიმე
 – და ზოჯერ ერთ დღეს – ცოცხლობს.
 უპასუხეთ კითხვებს და ერთად გავარკვიოთ
 რა ვიცით პეპლების შესახებ:

1. რითი შეიძლება პეპლის დაჭერა ისე, რომ ფრთები არ დაუზიანდეს?
 ა. საპნის ბუშტებით;
 ბ. პეპლის საჭერი ბადით;
 გ. ბუზის საკლავით.
2. რითი იკვებებიან პეპლები?
 ა. ქუჩის მტვრით;
 ბ. ბალახით;
 გ. ყვავილის ნექტარით.



იანანა

ტკბილად დაგინანავებ,
 გეტყვი იანანასა...
 დაფარფატებს პეპელა,
 ქარი უშლის ფრიალსა.
 აკვნის თავზე ჩამოჯდა,
 დღეს გისურვებს მზიანსა.
 ტკბილად დაგინანავებ,
 გეტყვი იანანასა...
 თმანუჭუჭა ბეკეკო
 როგორ ლალად კიკინებს,
 სულ მალე გათენდება
 და მამალი იყვლება.
 ტკბილად დაგინანავებ,
 გეტყვი იანანასა...
 რას უღიმი პატარავ,
 ნეტავ, ხედავ რასაო,
 ანგელოზი მოფრინდა?
 არ მოგაკლებს მადლსაო.
 ტკბილად დაგინანავებ,
 გეტყვი იანანასა...
 დაგნამვია ტუჩი რძით,
 არ გიგრძნია შიმშილი,
 ღვთისმშობელო დედაო,
 უპატრონე, იშვილე.
 ტკბილად დაგინანავებ,
 გეტყვი იანანასა...




მხატვარი
 მალხაზ კუსაშვილი

რ ი ნ ა 



3. ვინ არის პეპელა მანამდე, ვიდრე პარკს გაიკეთებს და იქიდან ხელახლა დაიბადება?
- ა. ჩიტი;
 - ბ. მუხლუხო;
 - გ. ჭიამაია.
4. რა ჰქვია ღამის პატარა პეპელას, რომელიც სინათლეს ეტანება და სულ მის გარშემო დაფარფატებს?
- ა. ფარვანა;
 - ბ. ფრთებფარფატა;
 - გ. ფოფოღია.

5. რა ჰქვია პეპელას, რომელიც მის ირგვლივ ძალიან ძვირფას აბრეშუმის ძაფს ქსოვს?
- ა. ოქროს პეპელა;
 - ბ. აბრეშუმის პეპელა;
 - გ. ხელმარჯვე პეპელა.
6. სად შეიძლება ნახოთ ყველაზე მეტი და ლამაზი პეპელა?
- ა. უდაბნოში;
 - ბ. ყვავილებიან მდელოზე;
 - გ. სახლის სახურავზე.



ოფოხი აქიჩის ცეც

თინა ჭაჭია



აპრილის ალუბლის თეთრი ყვავილებით მორთული დღეა. უკვე პირველი საათიც შესრულდა. სკოლიდან უმცროსკლასელები გამოფერადდნენ. ისეთი ჟღერტულა და სუფთა ხმებია, თითქოს აქვე, ნაძვებზე ბუდის მაშენებელ ჩიტებს ეჯიბრებიანო. ჩიტები კი, მოგესხნებათ, ამ დროს როგორ შეუჩერებლად ჟიჯივებენ. ჰოდა, ხმაურობენ პატარა, ცქვიტი გოგო-ბიჭები, ხოლო ბელურები, ჩიტბატონები და ვარდისფერკუდიანი თოხიტარა ჩიტები კი თითქოს ბანს აძლევენ...

აი, ელენე და მარიამი კი რატომღაც ჩუმად გამოვიდნენ სკოლის ეზოდან, ასევე ხმის ამოუღებლად ჩაჰკიდეს ერთმანეთს ხელი და თავიანთი ქუჩისკენ გაუხვიეს. რა უნდა მომხდარიყო?

– ელ, – ეუბნება მარი, – არა უშავს, არ დაგიჯერა და სხვა დროს ხომ თვითონაც ნახავს ნიკო ბაბუას? ლიზი მასწავლებელი სულ ჩვენი ქუჩით არ დადის!? ნახავს და მიხვდება.

– ჩემ წინ მიდიოდა, მარ, მასწავლებელი, მაგრამ ათი წუთი აკლდა ცხრას. სკოლა კი აქვეა, მაგრამ ისინი ხომ ჩვენზე ადრე უნდა გამოცხადდნენ. ისე ეჩქარებოდა, ვერ შეამჩნევდა, – ჩუმად ლაპარაკობდა ელენე.

– მოიცა, ელ, შენ როგორღა შეამჩნიე, ცუდად რომ იყო ნიკო ბაბუა?

– როგორ? გეტყვი. ხომ ზის ხოლმე დილაობით თავისი ჭიშკრის წინ, მობილური გვერდით უდევს და ზარს ელოდება. ჰოდა,

მათემატიკური თავსაცხები

		+			=			
	+		×			=		
	=			+		=		

ამოხსენი თავსაცხები, თუკი იცი, რომ თითოეული ფიგურა შეესაბამება რომელიღაც ერთ ციფრს, ე. ი. ერთნაირი ფიგურები მსგავსი ციფრების შესაბამისია.

მოვდივარ, შემოვუხვიე, ნიკო ბაბუა კი სკამზე იჯდა უკვე. მივუახლოვდი, უნდა მივსალმებოდი და უცებ ჯოხი გაუფარდა ხელიდან. დავიხარე, უნდა მიმეწოდებინა, მან კი ძლივს ჩაიჩურჩულა: ელენე, გენაცვალე, ცუდად ვარ და ნინო ბებიას შესძახეო. მე ჩანთა იქვე დავდე და დასაძახებლად შევირბინე. ამასობაში დრო გავიდა და დამიგვიანდა. შენ რას იზამდი, მარ, შენც ხომ ასე მოიქცეოდი?

– რა თქმა უნდა, აბა, ნიკო ბაბუას ხომ არ მივატოვებდი! მით უმეტეს, რომ ახლომახლო არავინ ყოფილა.

– არა, მარ, არავინ იყო, თან ხელები უკანკალებდა და ძალიან შემეცოდა. ერთ თვეზე მეტია, შვილს არ დაურეკავს ამერიკიდან და იმის ზარს ელოდება. იმ დღეს გაზეთებზე გავეგზავნე. რომ მივუტანე, თავისი ეზოს ყვითელი ტიტები დაეკრიფა და მაჩუქა, ჩვენ ხომ სულ წითლები გვაქვს. მითხრა, შემოდგომაზე ბოლქვებს ამოვიღებ, ნაილე, დარგე და ყვითლებიც გექნებაო.

– ჰო, ძალიან კეთილია. შარშან ჩემს ძმას, სანდროს, ველოსიპედი დაემტვრა. ნიკო ბაბუამ კი თავისი სარდაფიდან თითქმის უხმარი ველოსიპედი ამოუტანა და აჩუქა... უჰ, დაურეკოს იმ თავისმა შვილმა, რა იქნება! ასე აღარ იდარდებდა.

– ნეტა, როგორ არის, მარ, ხომ არ შეგვეხება?

– აი, მოვედით კიდეც. ესეც ნიკო ბაბუას მწვანე ჭიშკარი.

...და გოგონებმა ეზოს კარები ოდნავ შეაღეს. ნიკო ბაბუა ხის გრძელ სკამზე იჯდა, გვერდზე მობილური ედო, ხელში გაზეთი ეჭირა და კითხულობდა. გოგონებმა ერთმანეთს შეხედეს, მერე ელენემ

საჩვენებელი თითი ტუჩებთან მიიღო, ჭიშკარი ფრთხილად გამოიხურეს და ღიმილით განაგრძეს გზა. პირველი მარიამის სახლი გამოჩნდა.

– კარგად, ელ, არ იდარდო! – ხელი დაუქნია მარიამმა.

– ხვალამდე, მარ, უკვე აღარ ვდარდობ, – ჩანთა შეისწორა მხრებზე ელენემ.

უცებ ნიავემა დაუქროლა და ალუბლის თეთრი ყვავილები გულუხვად მიაყარა გოგონებს. ამ დროს მარის უკვე თავისი კარის სახელურზე ეკიდა ხელი, ხოლო ელენე მარჯვენა ქუსლით დატრიალდა, ისევ შემობრუნდა, უნდოდა ყვავილები დაეჭირა, მაგრამ ნიავემა როგორც მოაფრიალა, ისევ ისე გააქროლა ყველა ყვავილი. აკისკისებულებმა კიდეც ერთხელ დაუქნიეს ერთმანეთს ხელი. ნიავე კი უკვე ქუჩის ბოლოს დაცერცეტობდა და ფანტავდა და ფანტავდა ალუბლის ყვავილებს. აპრილის დღე იდგა.

მხატვარი თამთა მამუკელაშვილი



ენო ქოქოსაქა

მოტუუეკა

ნაადრევედ გამოვიდა დარი,
ჩვენს ეზოში მზის სხივები დახვავდა.
ბებო ამბობს: გასულელდა ატამი,
მოატყუა ამინდმა და აყვავდა!

ტყუილის თქმა ცუდიაო, ვიცით,
მაგრამ, მზეო – ჩვენი ხათრით – ატმის ხე,
რა იქნება, მოატყუო ისე,
რომ პირდაპირ დამწიფდეს.



მისეილ სარიტონაშვილი

სიქარა ბაქაფსულის ეზეუა

მზეო, მზეო, სიცოცხლის
მზე-მშობელი გქვიანო,
ამო, ამოალმასდი,
აღარ დაიგვიანო!


ბუჩქთან გელის სიცივით
მობუზული იაო,
ალუბალსაც კვირტები
ველარ გაუშლიაო;

ზვარში ვაზი მოგელის,
ველზე – ყანის შრიალი.
საქართველოს გვირგვინო,
ამო, ამობრიალდი!

მზია ჩხატიანი

ქრისტე აღსდგა


აჭიკჭიკდა, ფრთა გაშალა,
იფრთხილა ჭრელმა ჩიტმა,
მზემ ნათელი გადმოღვარა,
– ქრისტე აღსდგა!
– ჭეშმარიტად!
– ჭეშმარიტად! – გახსნა ბაგე,
შემოგვლიმა ვარდის კვირტმა:
– ქრისტე აღსდგა! ქრისტე აღსდგა!
– ჭეშმარიტად! ჭეშმარიტად!
განათდა და გაჩახჩახდა
გზებიც, დაბლობ-მალლობიცა,
ჩვენც მივყვებით ხალხის ტალღას
ლოცვითა და გალობითა.
წინ მიგვიძღვის უფლის ნება,
მისი წმინდა საღვთო სიტყვა...
– ქრისტე აღსდგა! – ისმის ყველგან...
– ჭეშმარიტად! ჭეშმარიტად!
გაგვინათოს მისმა მადლმა
გზა ყოველი, ყველა მხრიდან...
ქრისტე აღსდგა! ქრისტე აღსდგა!
ჭეშმარიტად!



მუხე კამუკავილი

მუე, წვიმა და უკუკრო

ამისთანა წვიმა მხოლოდ
გაზაფხულზე იცის,
ჯერ წკაპ-წკუპო, მაგრამ ბოლოს
მთლად განუნა ციყვი.
ყაყარო კი ნალვლიანობს –
ტყის ნაპირას მყოფი –
რა ვქნა, უნდა ვალიარო,
სულ პატარა მყოფნის...
უკვე მიჭირს ფეხზე დგომა,
ცრემლიც მიტომ მცვივა,
მეშინია, ვაითუ, ხალი
წამიშალოს წვიმამ.
მზე ღრუბლიდან აყრის სიცილს:
– ძლიერ მიკვირს შენი,
განა წვიმამ კი არ იცის,
ხალები რომ გშვენის?



მზია მამარიშვილი

დღეს პირველი აპრილია

მელაკუდა მიიმდერის:
– დღეს პირველი აპრილია,
ტყის ამბები მოვიგონე,
დაჯერება ადვილია:

პანანინა ჩიტმა სკვინჩამ
კუდი კურდღელს გაუცვალა;
ნასესხები თხილი ციყვმა
თავს უკლებლივ ჩაუთვალა;

აიშენა ქარმა სახლი,
აისრულა სანადელი;
ბუმბა დათვებს შეუჭამა
ვეებერთელა თაფლაკვერი;

ტკბილად გალობს ყვანჩალია,
ბულბულები გადარია;
ბიძაჩემის ქვევრის ღვინოს
წვეთი წყალი არ ასხია.

ჰა-ჰა-ჰა-ჰა, დელი-დელი,
დაგაჯერეთ ყველაფერი?

დღეს პირველი აპრილია,
მოტყუება ადვილია!



მხატვარი
იულია ნიკოზოსოვა

გულღია შუშის ბაყაყი დიანე და ნემსიყლაპია დრაკონი

ოკეანეში მიკარგულ ერთ შორეულ კუნძულზე ყველასგან გამორჩეული და განსაკუთრებული გულღია შუშის ბაყაყი დიანე ცხოვრობდა. ასე იმიტომ ერქვა, რომ ნახევრად გამჭვირვალე იყო და მისი გულის ფეთქვას ყველა ნათლად დაინახავდა, თუკი ოდესმე მიაგნებდა. დიანეს პოვნა კი იოლი სულაც არ იყო, ოსტატურად ინიღბებოდა და ამიტომ, ჯერ არავის ენახა – ის ხის ტოტებს აფარებდა თავს და მწვანე ფოთლებში იმალებოდა; იმის მაგივრად, რომ ჭაობში ეცხოვრა და ეყიყინა, სრულიად განს-

ხვავებულ ხმას გამოსცემდა, რომელიც ჭრიჭინობელას ჭრიჭინს უფრო ჰგავდა. ერთადერთი, ვისთანაც დიანეს გულითადი მეგობრობა აკავშირებდა, ალისფერი ნემსიყლაპია, მეტსახელად დრაკონი იყო.

დრაკონს და დიანეს ისიც აერთიანებდათ, რომ დრაკონის გამჭვირვალე ფრთას გულის ფორმის გამოსახულება ამშვენებდა.

შეეძლოთ, ერთმანეთისთვის გაეგოთ, ვინაიდან მწერების ენაზე ლაპარაკობდნენ. ერთხელ დრაკონმა დიანეს სასიხარულო ამბავი ახარა: მალე შენი დეიდაშვილები გაჩნდებიან და მათ მოსახულებლად ოჯახურ შეკრებაზე უნდა წავიდეთო. ტყის განაპირას, ხის ფულუროში, ნვიმის წყალი გუბდებოდა და, როგორც ყოველთვის, სწორედ იქ იჩიქე-

ბოდნენ შუშის ბაყაყის ლიფსიტები.

– დიანე, როდის წავიდეთ, დღისით თუ ღამით? – ჰკითხა დრაკონმა.

– დღისით რომ წავიდეთ, მეშინია, რომელიმე ფრინველმა არ დაგიჭიროს, ამიტომ ღამით წავიდეთ, – შესთავაზა დიანემ და დრაკონიც დასთანხმდა.

ღამით, როცა სავსე მთვარემ არემარე გაანათა, მეგობრები გზას გაუდგნენ. დიანე ფოთლიდან ფოთოლზე ხტებოდა, დრაკონი კი წინ მიფრინავდა, დანინაურებული რომელიმე ტოტზე ჩამოსკუპდებოდა და უცდიდა, დიანე ხტუნვა-ხტუნვით როდის დაენეოდა.

სანამ მთვარე ღრუბლებს მიეფარებოდა, დანიშნულების ადგილს მიაღწიეს. გარშემო შუშის ბაყაყების მთელი სანათესაო შეკრებილიყო და ლიფსიტების გამოჩეკას მოუთმენლად ელოდა.

იქაურობას ციციანათელები დასტრიალებდნენ და არემარეს ანათებდნენ მკრთალად მოკიაფე შუქით, თუმცა ესეც საკმარისი იყო იმისთვის, რომ დაენახათ ის საოცარი სანახაობა, რასაც ყველა ასე უცდიდა. კარგა ხნის მოლოდინის შემდეგ ფულუროში ჩაგუბებული წყლის ზედაპირზე მოტივტივე ფოთოლი უცბად ამოყირავდა და წყალში გადაეშვა გულის ფორმის ასობით პანანინა წითელი არსება. ესენი იყვნენ შუშის ბაყაყის ახლად გამოჩეკილი ლიფსიტე-

ბი – თითოეული მათგანი წყლის წვეთს ჰგავდა და სრულიად გამჭვირვალე იყო, მხოლოდ წითელი მფეთქავი გული უჩანდათ.

გაივლიდა სულ ცოტა ხანი და წითელი ლიფსიტები გაიზრდებოდნენ, ცურვის მაგივრად თათებზე ხტუნვას შეძლებდნენ და სწორედ მაშინ მიაკითხავდა ყველას თავისი მენწყილე ცეცხლოვანი ნემსიყლაპია დრაკონი, რომელიც ტყის სიღრმეში გაუძღვებოდა და იქ დამალავდა, ასწავლიდა მწერების ენას ყიყინის მაგივრად და მარადიულ მეგობრობას და ერთგულებას შეჰფიცებდნენ ერთმანეთს. ამის ნიშნად, ალისფერი ნემსიყლაპია ფრთებზე წითელ გულს გამოისახავდა, ზუსტად ისეთს, როგორიც გულღია შუშის ბაყაყს უცემდა მკერდში.

მხატვარი
ლიკა გურბენიშვილი



შუშის ბაყაყის ახალი სახეობა



კოსტა რიკას ტროპიკულ ტყეში 2015 წელს ამფიბიების შემსწავლელი ცენტრის მკვლევარმა ბრაიან კუბიკიმ აღმოაჩინა შუშის ბაყაყის ახალი სახეობა, რომელსაც თავისი დედის პატივსაცემად „დიანეს გულღია შუშის ბაყაყი“ უწოდა.



ახალაღმოჩენილ ამფიბიას მაშინვე უპოვეს ორეული, პოპულარული მაპეტ-შოუს ცნობილი პერსონაჟი ბაყაყი კერმიტი. ორივეს ერთმანეთის მსგავსი შავგუგვიანი თეთრი ფერის თვალები აქვს.



დიანეს გულღია შუშის ბაყაყი გამოირჩევა ზურგზე ხასხასა მწვანე შეფერილობით, მაგრამ სხეულის შიდა ზედაპირზე კანი გამჭვირვალე აქვს, რაც საშუალებას იძლევა, ნ გავარჩიოთ მისი მფეთქავი ნითელი გული. ასევე, გამოსცემს დამახასიათებელ ბგერებს, რომელიც მწერის ხმას უფრო ჰგავს, ვიდრე ბაყაყის ყიყინს.

ბაყაყი ძალიან პატარაა, სიგრძით მხოლოდ 2,5 სმ-ია, რის გამოც მისი პოვნა იოლი არ არის.

ამჟამად მსოფლიოში შუშის ბაყაყის უკვე 149 სახეობაა ცნობილი და აქედან 14 – კოსტა რიკაზე.



კოსტა რიკას ნისლიანი ტყეების ბინადარი ალისფერლაქებიანი ნემსიყლაპია

კოსტა რიკას ნისლიან ტროპიკულ ტყეებში ნემსიყლაპიების (ინგლისურად Dragonfly) განსაკუთრებული ჯიშის ბინადრობს, რომელსაც მეცნიერებმა დაარქვეს ჰეტერინა, რაც პატარა თანამგზავრს ნიშნავს (ინგლისურად მას Hetaerina ჰეტერინა, თუმცა ეს სიტყვა ბერძნული წარმომავლობისაა (ἑταίρα).

ნემსიყლაპიების ამ გვარის სხვადასხვა წარმომადგენელს ხშირად უწოდებენ სამხრეთამერიკულ ალისფერლაქებიანს, ხანაც სისხლისფერს – ფრთების ნითელი შეფერილობის გამო. ზოგი მათგანი გადაშენების საფრთხის წინაშეა და ნითელ წიგნშია შეტანილი. ამ საშიშროებას ადამიანის მიერ მათი ბუნებრივი საარსებო გარემოს განადგურება ქმნის.



ბონდო მაცაბარიძე



არ იფიქროთ, რომ მეღიებს
 მოატყუოთ რამე.
 რამსიგრძე კუდს დღე უყურებთ,
 სამი იმდენი აქვთ ღამე!
 – არა გჯერათ?
 – კი ბატონო, თუ არ გჯერათ,
 მოდიტ მაშინ ხვალ დილიტ და...
 ერთმანეთი თვალებით!



სიზშაჩი

წუხელ ძილში მესტუმრნენ
 ზოოპარკიდან სტუმრები,
 ბუქნაკოჭა გამართეს –
 ვერ ვძღებოდი ყურებით.





ყირას იდგა მელია,
 ხუნტრუცობდნენ ტურები,
 ვიხალისეთ დიღამდე – ოჰ, ჰო, ჰო, ჰოო,
 გავიხარეთ გულები!

ვისურვე, რომ დილითაც
 კვლავ მწვეოდნენ სტუმრები.
 გავახილეთ თვალი და
 ბალიშიდან მიმზერდნენ...

ჩამოყრილი ყურები.


მხატვარი
ბიორგი ჩაჩანიძე






კესო ფრანგიშვილი, 12 წლის

ბავშვთა



შემოქმედება

თათია ოზაიძე, 11 წლის
თიანეთის რ-ნი, სოფელ
სიმონიანთხევის საჯარო
სკოლის მოსწავლე



ანასო ერიასვილი, 8 წლის
თბილისის 126-ე
საჯარო სკოლის მოსწავლე




ადამიანი და უკრები

არც ერთი ადამიანი ერთმანეთს არ
ჰგავს, ყველა განსხვავებულია. მაგალითად,
დამისვით კითხვა, რატომ არის საჭირო
ადამიანის გაჩენისთვის ორი ადამიანი?
ახლავე გიპასუხებთ: ჩვენ, ადამიანები,
ფერებს ვგავართ. ყვითელი და ლურჯი რომ
შეჯუროთ, მივიღებთ მწვანეს, თეთრის და
წითლის არევიტ ვარდისფერს მივიღებთ,
ვარდისფერისა და ლურჯის არევიტ -
იისფერს, ლურჯისა და მწვანის არევიტ კი
- ყავისფერს.
მე, თავიდან ბოლომდე, არც დედას ვგავარ
და არც მამას. მე ახალი ადამიანი ვარ!

ვიციროების ოჯახი

მოამზადა
ნინო მრვალია

ეს ვიციროების
ოჯახია. არსად არ ისმის
ისე ხშირად „მე რას
მეკითხები, ვიცი რო?!“ -
როგორც ამ ოჯახში. იქნებ
დაეხმაროთ დავალებების
შესრულებაში, თორემ ამ
პასუხის იქით ვეღარ მიდიან
და ყველაფერში ხელი
ეშლებათ.



ყურადღებით ნაიკითხე დავალებები და გაიგებ,
ვინ ცხოვრობს ვიციროების ფერმაში

1. ის, ვინც სტაფილოს მადიანად ახრაშუნებს, თან გრძელი ყურები აქვს;
2. ის, ვისაც პატარაობისას ზაქს ეძახდნენ, გაიზარდა და ჰქვია;
3. ის, ვინც გათენებას ყივილით გვამცნობს;
4. ის, ვინც გასაგრილებლად ლაფში კოტრიალობს.

იპოვე 8 ცხოველი ნახატზე



მოდის ვითანამშრომლოთ!

ამ, ნომრიდან ჟურნალი შემოგთავაზებთ თითო მოთხრობას და ნახატს. ბავშვებო, გვინდა, მოთხრობა თქვენ თვითონ გააფორმოთ სათანადო ნახატებით, ხოლო ნახატი კი გააფერადეთ და შემდეგ იმის მიხედვით პატარა ამბავი დაწერეთ. საუკეთესო ნამუშევრები დაიბეჭდება ჟურნალის საიუბილეო მე-11 ნომერში. შემოქმედებით წარმატებებს გისურვებ, ჩვენო პატარა მკითხველებო.

ანნა ქართველი
ანასტასია ქართველი

ზღაპარი ჭიანჭველას

ტყეში, ხის ქვეშ, ერთი ჭიანჭველა ცხოვრობდა. ერთხელ ისე მოხდა, რომ თავის მეგობრებს წაეჩხუბა და ნაწყენმა გადაწყვიტა:

„წავალ, მარტო ვიცხოვრებ. არავისთან არაფრის გაყოფა არ მომიწევს – რასაც ვიპოვი, ყველაფერი ჩემი იქნება!“.

ერთ დილას ჭიანჭველა წყაროზე წყლის მოსატანად წავიდა და ხედავს – გზაზე დაბრანულგვერდებიანი ღვებელი დავარდნია ვილაცას. ჭიანჭველამ გადაწყვიტა, წავიღებ ჩემს სახლში და დავმალავო. ხან ერთ გვერდზე დაექაჩა, ხან მეორეზე, ძვრა ვერ უყო, ამხელა ტვირთს ვერაფრით მოერია.

აი, ხედავს ჭიანჭველა, რომ წვიმასაც აპირებს, შავი ღრუბლები მოქუჩიბულან, ელავს და ჭექა-ქუხილის ხმაც ისმის.

ღელავს ჭიანჭველა: „ვაი, ვაი, ჩემს ღვებელს წვიმა დაასველებს და დააღბობს. უგემურ, ჭუჭყიან ფაფად გადააქცევს.“

ენანება ჭიანჭველას გემრიელი ღვებელი გასაფუჭებლად, ჩამოჯდა ქვაზე და ატირდა. მერე კი გადაწყვიტა:

„მოდის, ჩემს მეგობრებთან გავიქცევი და დახმარებას ვთხოვ!“

მიიღბინა ჭიანჭველების ბუდესთან და შესძახა: „ეჭვი, მეგობრებო, ჩქარა, ჩქარა! წვიმას იწყებს, მე კი წყაროსთან, ბილიკზე ღვებელი ვიპოვე. ღვებელი დიდია, ყველას გვეყოფა!“





გაიქცნენ ჭიანჭველები წყაროსაკენ. დაინახეს გვერდებდაბრანული, მადის აღმძვრელი ღვებელი. დაესივნენ ყველანი, ერთად ასწიეს და გააქანეს ბუდისაკენ.


წვიმა რომ დაიწყო, მეგობრები უკვე ბუდეში იყვნენ, უგემრიელეს ღვებელს შეექცეოდნენ და ტკბილ მაყვლის წვენს აყოლებდნენ.

ყველა ბედნიერი და გახარებული იყო, განსაკუთრებით კი ჩვენი ჭიანჭველა, რადგან თავისი საყვარელი მეგობრების ფასი გაიგო და შეურიგდა!

შექმენი ამ მოთხრობისთვის ილუსტრაცია და გამოკვებავნე
ელექტრონულ ფოსტაზე: dila1904@yahoo.com

ამ ნახაყის მიხედვით შეადგინე
მოთხრობა







ძროხა




ლექვი



კატა



თიკანი




ღორი



წინილა



თხა



ხბო



ძაღლი



გოჭი



ქათამი



კნუტი

ვიციროების პატარა ბიჭს დიდი გასაჭირი აქვს: საშინაო დავალებას წერს და ვერაფრით იხსენებს, რა ჰქვია ძროხის შვილს. სახლში ყველა ერთი და იმავე პასუხით იშორებს: „მე რას მეკითხები, ვიცი რო?!“

დაეხმარე და ყველა ცხოველი ხაზებით დაუკავშირე თავის შვილს.

ვიციროებს ბალი აქვთ. გაინტერესებთ, რა მოჰყავთ?

1. ამ ხილის ერთ-ერთი ჯიშია თურაშაული;
2. ადამიანზე იტყვიან, ამ კენკრასავით თვალები აქვსო;
3. ვიციროების გოგო კუნწულებს ყურზე იკიდებს და ამ ხილის ერთ-ერთ სახეობას გოგრას ეძახიან.

გააფერადე ნახატი და იპოვე 8 სახის ბოსტნეული, რომლებიც ვიციროებს მოჰყავთ თავიანთ ბოსტანში.



სოსუს

ფუნჯს ავიღებ და დავხატავ საოცნებო ზღაპარს: თეთრ თოლიებს და მის ირგვლივ მონატრებულ ქალაქს.

მაგნოლიებს, მოლივლივე ზღვის წკრიალა ნაპირს, თეთრ იალქნებს, აფრებიანს, სუნი დასდევს ნატვრის.

იქ ჩვენ გვიხმობს შორის შორით ზღვა და ბილიკები, დიდი მწვანე პალმები და მზე, ცეცხლივით მწველი.

ოჰ, სოხუმო, გვენატრები, ეს ნატვრაა წმინდა, აგვიხდინე, ღმერთო, მალე – ჩვენ იქ ჩასვლა გვინდა.



ნახატი ავტორისა

სიწყევლის ზოგახში

მომზადა
ნიკო ორპელმა

ამოხსენი კროსვორდი და ისრით მინიშნებულ მწკრივში ამოიკითხე ალუჩის ძველი ქართული სახელწოდება.

1					
2					
3					
4					
5					
6					
7					
8					
9					
10					

- მტაცებლის დიდი კბილი;
- ბიჭუნა, რომელსაც ბალუ და ბაგირა ემსახურებოდნენ;
- სანვაგად დაპობილი ხე;
- მწვანე ბოსტნეული;
- ყიყინა ამფიბია;
- ზოლებიანი მტაცებელი ცხოველი;
- გაზრდილი ზაქი;
- ყვავის ბარტყი;
- კურკოვანი ხილი;
- ნაგებობა მიზანში სროლისათვის.



შეჩილი სიტყვა

(ზღაპარი)



იყო და არა იყო რა, იყო ერთი უცნაური ქვეყანა. ამ ქვეყანაში აკრძალული იყო ტკბილი სიტყვა. სამეფოს ხელმწიფეც უცნაური ჰყავდა – ერთი უჟმური და უსახური ვინმე იყო. ქალაქის მოედანზე შეჯიბრებებსაც კი მართავდა ავყიაობაში. ჯილდოს მას აძლევდა, ვინც უფრო მწარეს და გულისმოსაკლავს ეტყოდა მოწინააღმდეგეს.

მეფეს ერთადერთი ქალიშვილი ჰყავდა. რა თქმა უნდა, ისიც უხასიათო და უცხვირპირო. გაღიმებულსა და თბილად მოლაპარაკეს ვერ ნახავდით. დადიოდა და მწარე-მწარეებს ისროდა აქეთ-იქით. გოგონას უმშვენიერესი ბალი ჰქონდა – იშვიათი და ულამაზესი ყვავილებით. მეფის ასული ყოველ დილით სერიზობდა სასახლის ბაღში და თავისი ნალკოვით ტკბებოდა.

ერთ დღესაც ხელმწიფის ქალი გამობრძანდა ბაღში და რას ხედავს?! ყველა ყვავილი დამჭკნარ-დახრუკულიყო. ატყდა ერთი ვაივიში. მბრძანებელმა ექიმები და მებაღეები მთელი ქვეყნიდან მოიხმო, მაგრამ რა... როგორც მოდიოდნენ, ისე მიდიოდნენ – ვერავინ უშველა საცოდავ ყვავილებს. მეფის ასული უარესად ჩამოზეთილი სახით გაკაპასებული შველას ითხოვდა. ხელმწიფემ და ნაზირ-ვეზირებმა აღარ იცოდნენ, რა ექნათ.

ბოლოს ერთმა ხნიერმა და გამოცდილმა ექიმმა მოინახულა ბალი და მეფეს უთხრა: – მე ვიცი ნამალი! ყვავილებს დაავადებისაგან მხოლოდ ტკბილი სიტყვა განკურნავსო.

ირგვლივ ყველამ გაკვირვებით მიმოიხედა და მხრები აიჩეჩა. აღმოჩნდა, რომ სასახლეში ტკბილი სიტყვა აღარავის ახსოვდა. მაშინ მბრძანებელმა ყველა კუთხით აფრინა შეგირდები, რომლებსაც ტკბილი სიტყვის მცოდნე კაცის მოყვანა დაავალა და თან დიდი ჯილდოც დაანესა.

ხელმოცარული შიკრიკები მალევე დაბრუნდნენ და ხელმწიფეს შიშით მოახსენეს: – დიღო მეფეო, სამეფოში ადგილი არ დავიტოვებია უნახავი, მაგრამ ასეთი სიტყვის მცოდნე ვერავინ ვნახეთო. ყველა სასონარკვეთას მიეცა. აღარ იცოდნენ, რა ექნათ. ბოლოს ერთმა მსახურმა მეფეს შეჰკადრა: – თუ არ დამსჯით, გაგიბედავთ და გეტყვით, ქალაქის ბოლოს რომ ერთი დედაბერი ცხოვრობს, იმის ვაჟი ამას წინათ რაღაც უცნაურ სიტყვებს ამბობდა და ლილინებდა, მგონი ის უნდა იყოს ტკბილი სიტყვაო!

ხელმწიფემ სასწრაფოდ გაგზავნა ცხენოსნები ბიჭის მოსაძებნად. ის მალევე მოიყვანეს და სასახლის ბაღში შეუშვეს. ყმანვილი გაღიმებული სახით თითოეულ ყვავილთან



მიდიოდა, ეფერებოდა და თბილ, გულის გასახარელ სიტყვებს ჩასჩურჩულებდა. მოხდა საოცრება – ყვავილები ერთიმეორის მიყოლებით იშლებოდა და ირგვლივ საოცარ სურნელს აფრქვევდა.

ბალიდან გამოსვლისას ვაჟმა მეფის ასულს გვერდით ჩაუარა და სააშიკო, სასიამოვნო სიტყვა ჩასჩურჩულა ყურში. ქალიშვილი მოულოდნელობისაგან შეიშმუშნა და... ჰოი, საოცრებავ, – გაელიმა კიდეც. ერთს მეორე მოჰყვა, ბოლოს კი გულიანად გაეცინა და გადაიკისკისა. მის შემხედვარე ხელმწიფესაც ჯერ უღვაშებში ჩაელიმა, მერე კი ნაზირ-ვეზირებთან ერთად გულიანად ახარხარდა.

ხალისი და სიცილი მთელ სამეფოს მოედო. ხალხმა შვებით ამოისუნთქა. მეფემ ბრძანება გასცა: – ამიერიდან ვინც მწარე და გულსაკლავ სიტყვას იტყვის, სასტიკად დაისჯებაო. ხალხი ერთმანეთს ღიმილით ესალმებოდა, თბილი სიტყვები საუბრისას თავისთავად მოდიოდა. შედეგად ქვეყანა-



ში საქმე უფრო წინ წავიდა. სამეფოც უფრო გაძლიერდა და გალამაზდა.

ხელმწიფის ასული იმ ყმანვილზე დაქორწინდა, რომელმაც ქვეყანა ავსიტყვიანობისაგან გადაარჩინა და გაამშვენიერა. მათი ქორწინება მთელმა სამეფომ ზარ-ზეიმით აღნიშნა. ისინი დიდხანს და ბედნიერად ცხოვრობდნენ და სიბრძნითა და ხალისით მართავდნენ ქვეყანას.

**მხატვარი
ნათია არსენიშვილი**





პატარა საბას დიდი სიზმარი

პატარა საბამ სიზმარი ნახა,
სიზმარი ნახა დიდი –
გადარკალული ცის კამარაზე
თალი – შვიდფერი ხიდი,
ცა – განთიადით მიმოქანდული
და ჯადოსნური ხიბლის.

გასაოცარი იყო სივრცე და
გასაოგნები ხედი –
მტრედისფერ ცაზე იალქანივით
ფრთამოლივლივე მტრედი,
შვიდფერ ღიმილში აბრწყინებული
ღიმი უმანკო დედის.

ღიმი – ნაზი და თეთრი შროშანი,
გედის უბინო ღიმი
და განთიადის უბე-საკინძეს,
ვით აწყვეტილი ღილი,
მარჯნის ბაგეზე გადარბენილი
ღიმი – ღიმილის ღიმი...



და ედგა ნათლის ღვთიური სვეტი
მთას – ელეონს და თაბორს,
შვიდი ფერია ცად მიჰყვებოდა
ანგელოზების თაბორს
და იხსენებდა მხოლოდ გოლგოთა
ერთ არსაცნაურ ამბორს...

გაღვიძებულმა დილით საბუნამ
უხმო მოგვსა და მისანს,
უთხრა: –

ბრძენკაცო, თუ განმიჩხიბავ
ამ სიზმრის არსს და მიზანს,
მაშინ მე ვიცი, რასაც გიბოძებ,
მე ვიცი, რასაც ვიზამ...

აქ უთხრა რაბამ:

– ძვირფასო, საბა,
კარგად დაფიქრდი, აბა;
სიზმარი შენი ნიშნავს ზეციურ,
ფრიად იდუმალ ამბავს,
განგებისაგან მირონცხებულს და
აიაზმაში ნაბანს...

ვიდრე სიზმართა წიგნს გადავშლიდეთ,
დათმენა გმართებს დიდი;
უპირველესად, უნდა დამშვიდდე,
იყო წყნარი და მშვიდი,
უნდა წარმოსთქვა ლოცვა
შვიდგზისი,
ცა გაიარო შვიდი.



დიდ გზაზე უფლის სიბრძნე და ცოდნა იქნება შენი გიდი, რომ წარმატებით გადაიარო შვიდჯერ შვიდფერი ხიდი; ეს გზა ის გზაა, რომლითაც მხოლოდ უფლის რჩეული მიდის...

ვინლა გახილა ასე პანისას სიზმარი ესე დიდი? გადარკალული ცის კამარაზე თალი – შვიდფერი ხიდი? გასაოცები და იდუმალი თვალთანამღები ხიბლის?

ქვეყნიერებას ვინ გაუზომა სიგანე ანდა სიგრძე? ვინ ეზიარა იმ დასაბამით უფლის ცოდნას და სიბრძნეს? ვინ განალაგა საგნები სივრცედ ან მოვლენები რიგზე?

ჩემო პატარავ, შენი სიზმარიც სხვა სიღრმეებზე სიბრძნობს, გაიზრდები და ყოველ დაფარულს ეზიარები, ვინძლო, მაშინ სამყაროს შენი გონით და მთელი სხეულით იგრძნობ...

მაშინ სამყაროც შეგითვისებს და თავად სამყაროც გიცნობს...

პაუკასი



დამთავრდა სამუშაო დღე მშენებლობაზე. დარაჯმა ალაცაფის კარი ხრიგინით დახურა და შვილიშვილთან ერთად საყარაულო ოთახისკენ წავიდა. ახლად გაღესილ კედელს რომ ჩაუარეს, პატარა ბიჭი შედგა და გაკვირვებულმა მიმართა პაპას:

– პაპი! ზევით, კედლის ბოლოში ჩიტებს ბუდე ჰქონდათ მონყობილი. ის კედელი დღეს რომ გაღესეს, რა მოუვიდოდათ იმათ ბარტყებს? ვაითუ, შიგნით მოყვნენ. ის ორი ჩიტი ნამდვილად მშობლები არიან, ბარტყები კი არ ჩანან.

ვიდრე პაპა რამეს ეტყოდა, პატარა ხარაჩოზე შეხტა და ზევით დაიწყო ასვლა. იმ ადგილს, სადაც ბუდე ეგულებოდა, მალე მიაღწია. იქვე, ფიცრიდან ამოშვერილი ლურსმანი ამოაძრო და საქმეს შეუდგა: ახლად ნაღესში ლურსმნით ვინრო ხვრელის გაჭრა არ გასჭირვებია და... სულ მალე გახარებული ჩიტების ჟღურტული მოაცილებდა პატარას ქვევით ჩამოსვლისას.

პაპამ შვილიშვილს თავზე ხელი გადაუსვა და სიყვარულით ჩაიკრა გულში.

მხატვარი
ანნა კანდელაკი





მოკლე მკვებები მშობლებისათვის

მარია მონტესორი, (1870-1952) იტალიელი ჰუმანისტი, პედაგოგი, პირველი ექიმი ქალი XIX საუკუნის იტალიაში ცნობილია, როგორც ახალი პედაგოგიური მეთოდის ავტორი. 1898 წლიდან მონტესორი გონებრივი ჩამორჩენილობის მქონე ბავშვების სკოლის დირექტორი იყო. ამ პერიოდში დაიწყო მან თავისი თეორიის პრაქტიკაში დანერგვა და სწავლების მეთოდების შემუშავება, რაც დღეს მონტესორის თეორიის სახელით არის ცნობილი. მონტესორის სამჯერ მიანიჭეს ნობელის პრემია პედაგოგიკაში განსაკუთრებული წვლილისა და მსოფლიოში ბავშვთა უფლებების დაცვისათვის. დღეისათვის მონტესორის სკოლა და მისი მეთოდი მთელ მსოფლიოშია გავრცელებული.

მარია მონტესორიმ ჩამოაყალიბა მოკლე მკვებები მშობლებისთვის, რომელთა გათვალისწინება სასარგებლო იქნება ყველა მშობლისთვის:

1. ბავშვები სწავლობენ იმას, რასაც ირგვლივ ხედავენ;
2. თუ ბავშვს ხშირად აკრიტიკებენ, ის სხვის გაკიცხვას სწავლობს;
3. თუ ბავშვს ხშირად აქებენ, ის შეფასებას სწავლობს;
4. თუ ბავშვს მტრობას უჩვენებენ, ის ჩხუბს სწავლობს;
5. თუ ბავშვთან გულწრფელები არიან, ის სამართლიანობას ეჩვენებს;
6. თუ ბავშვს ხშირად დასცინიან, ის მორცხვი და გაუბედავი ხდება;
7. თუ ბავშვი თავს უსაფრთხოდ გრძნობს, საკუთარი თავის რწმენას იძენს;
8. თუ ბავშვს ხშირად არცხვენენ, ის მუდმივად დამნაშავედ გრძნობს თავს;
9. თუ ბავშვს ხშირად უწონებენ საქციელს, ის საკუთარი თავის პატივისცემას სწავლობს;
10. თუ ბავშვის მიმართ ხშირად იჩენენ მიმტეველობას, ის მოთმინებას სწავლობს;
11. თუ ბავშვს ხშირად ამხნევენ, ის თავდაჯერებული ხდება;
12. თუ ბავშვი მეგობრულ გარემოში იზრდება და თავს საჭიროდ მიიჩნევს, ის სიყვარულს პოულობს;
13. არასდროს თქვათ ბავშვზე ცუდი – არც მისი თანდასწრებით და არც მის გარეშე;
14. ყურადღება გაამახვილეთ ბავშვში კარგი თვისებების განვითარებაზე და ცუდისთვის ადგილი აღარ დარჩება;
15. ყოველთვის მოუსმინეთ და უპასუხეთ ბავშვს, როდესაც მოგმართავთ;
16. პატივი ეცით ბავშვს, რომელმაც შეცდომა დაუშვა და ცდილობს მის გამოსწორებას მაშინვე ან ცოტა მოგვიანებით;
17. ყოველთვის დაეხმარეთ ბავშვს, რომელიც ძიების პროცესშია და შეეცადეთ, შეუმჩნეველი იყოთ იმ ბავშვისთვის, რომელმაც ეს პროცესი უკვე გაიარა;
18. დაეხმარეთ ბავშვს, აითვისოს ის, რაც აქამდე არ აუთვისებია. გააკეთეთ ეს მზრუნველობით, მოთმინებით, შეუმჩნეველად და სიყვარულით;
19. ბავშვთან ურთიერთობისას კარგი მანერებით იმოქმედეთ, დაანახვეთ მას ყველაფერი საუკეთესო, რაც თქვენშია.



ბელა გველესიანი

გაბრიელი

გათენაძე გაბრიელი
სამი წლისა გახდა უკვე,
დილით ადრე დგება ხოლმე
და მთელ ეზოს შემოურბენს.

წინ მიგორავს მისი ბურთი,
უკან მისდევს თვითონ მარდად,
დარტყმა! არის! – მისი ბურთი
მეზობელთან გადავარდა.

უკან დასდევს ყეფით მარლი:
– ჰამ, ჰამ! მეც მომეცი პასი!
გაბრიელს კი სად სცალია:
ინიესტაა, ხან კი მესი.

არ ბეზრდება მას მთელი დღე
ბურთის დევნა და თამაში,
თან თამაშობს, თან კი, იცით,
ვერვინ ჯობნის მას ჭამაში.

განა მარტო სირბილს არის
აყოლილი ჩვენი ბიჭი –
აქვს სიმღერის, ცეკვისა და
დოლზე დაკვრის დიდი ნიჭი!

ბებოსთანაც მეგობრობს,
ყველა სიტყვას უჯერებს –
კარგად თუ არ მოიქცევა,
ვერ მიიღებს ჩურჩხელებს.

...და გათენდა ახალი დღე,
დილა არის მზიანი,
მორბის ბურთით გაბრიელი
პირმზელიმილიანი...



ლელა ცუცქირიკა



ბაჭია

– გამარჯობა, ბაჭია,
კარგი კაბა გაცვია.
– ლამაზია? ხომ მოგწონს?
– დიახ, დიახ, ძალიან!
სად იყიდე? მეც მინდა,
იქნებ, მითხრა, კეთილო.
– არსად, კომბოსტოსაგან
შემიკერა დედიკომ.

ზოახი

– გამარჯობა, ზღარბუნა,
ზურგჩანთაში რა გიდევს?
– სოკო, ჩემო ბატონო,
ნანვიმარზე დავკრიფე.





ფურია დილანა და მებოზრები

(გაგრძელება. დასაწყისი „დილა“ №1, №2, №3)

– ამ ღამით ჩვენი ცის სტუმარი ისე ჩამ-
რგვალდა, ეს ჩვენი ბადრი მოპარული თაფ-
ლით ლოყებგაბერილ ბურდღუნა დათვს და-
ემსგავსა, – ყურები მკვირცხლად აცქვიტა
და თათის ცერი ცისკენ გაიშვირა ბაჭიამ.

– ეეე... ვინაა ეგ ბადრი? აბა, გაბედოს და
თაფლს მიეკაროს, ვაი, მისი ბრალი! – წარ-
ბები კუმტად შეჭმუხნა, ტორები კიდევ მაგ-
რად მომუშტა დათვმა.

– დაშოშმინდი, შე მართლა ბურდღუნავ,
ბადრი მთვარეა-მეთქი, მთვარეეე! – ნაცა-
რამ თათი ჩაიქნია და კოცონს ერთი მომცრო
ფიჩხი შეუკეთა.

– ოო, რახან მთვარეა, იყოს ლოყებსაგ-
სე... ამბობენ, ფულს თუ დაანახვებ, აბევ-
რებსო და... თაფლიან ქოთანს გააბევრებს?
– დათვს გუნება უცებვე გამოუკეთდა.

– მაინც რამდენი ქოთანი გინდა გქონ-
დეს? ეგება ჯობდეს, ფერია დილანას სთხო-
ვო. ხომ იცი, დახმარებას არ დაგზარდება.

– ეგ კი ვიცი, ციყვო, მაგრამ... ისიც ვიცი,
რომ დილანა ხარბებს არ წყალობს, უუუამ-
რავი და უუუთვალავი ქოთანი რომ ვთხოვო,
ვაი და, გავაბრაზო?!

– დათვიმართალია! გაბრაზებული დილანა

ზღაპრებს აღარ მოგვიყვება და, აბა, ზღაპრის
გარეშე ბარტყები როგორ დავაძინო?! – ჩხიკ-
ვი შეფრთხილდა და ბარტყები ფრთებქვეშ
მოიქცია.

ამასობაში ვერცხლისფერი ღრუბელიც
გამოჩნდა და აი, სულ მალე ფერია დილანა
კოცონთან ჩამოფარფატდა.

– დღეს ჩვენი ფერია ისეთი ლამაზია, რო-
გორც არასდროს!

– გრძელი კაბა როგორ უხდებააა...

– კარგი, კარგი... შეპირებულ ზღაპარს
ისედაც მოგიყვებით, ამდენს ნუ მაქვთ, –
დილანამ ღიმილით გადახედა აჩოჩქოლე-
ბულ ტყის ბინადრებს, მერე ჯადოსნური
ჯოხი აიქნია და თითქოს ტელევიზორის ეკ-
რანიო, რასაც ჰყვებოდა, ყველაფერი კად-
რებივით ჩნდებოდა.

– სამზევეთის ტყიდან ძააალიან შორს,
სადღაც თვალუნვდენელ სივრცეში შოკო-
ლადის სამეფო გახლდათ გადაჭიმული. თხი-
ლისა და ქიშმიშების ციცქნა სამეფოების
დაპყრობის შემდეგ შოკოლადის სამეფოში
მცხოვრებმა შოკოლადისვე რაინდებმა თავი
უძლეველად დაიგულეს და ისე გადიდგულ-
დნენ, უმიზეზოდ ხან ვის აუხირდნენ და ხა-
ნაც ვის.

პატარა, სუსტი სამეფოების აოხრებით
გული მალევე იჯერეს, ჰოდა, შოკოლადის
მშვილდ-ისრებითა და ფარ-ხმლებით შეი-
არალებულებმა ყველასთვის საყვარელი მზის
სამეფოს დაპყრობა გადანყვიტეს. არადა,
ნეტავ, რას ერჩოდნენ, მათ სამეფოში ხომ
მზე თვალთ არასდროს ენახათ, უბრალოდ
ყურმოკვრით იცოდნენ, რომ დიდი იყო,
ცხელი, კაშკაშა და მწველი, მაგრამ ერთმა-
ნეთის და საკუთარი თავის ქებით რეტდასხ-
მულეებს განა ეს შეაშინებდათ? შოკოლადის



აბჯრები მოირგეს, შოკოლადის ცხენებს შემოახტნენ და მზის სამეფოსკენ ისეთი სისწრაფით გასწიეს, ირგვლივ სულ შოკოლადის ბული დააყენეს.

მალე ჰორიზონტზე მზის სამეფოს კარიბჭე გამოჩნდა.

– იიიმოდენა ქიშმიში და ვაფლი გაგვინყვეტია და ერთ მზეს როგორ ვერ მოვერევით?! – ნიშნის მოგებით გაიძახოდნენ რაინდები და ცამდე აწვდილ კარიბჭესთან შექურჩებულები ყურისწამლებად ჩორჩოლობდნენ. კარგა ხანს უსმენდა მზე მათ უაზრო ყოყლოჩინობას და ბაქაიობას, მაგრამ როდემდე?

– ნეტავ, ამდენს ვინ ბედავს? – მზესაც აევსო მოთმინების ფიალა და ღრუბლის სარკმლიდან ცალი თვალით გამოიჭყიტა.

– დაგვნებდი, მზეო!

– ტყვედ ჩაგვბარდი და სიცოცხლეს გაჩუქებო! – ისევ აჩორჩოლდნენ რაინდები, თან მშვილდ-ისრები მოზიდეს და ... ორიოდ წუთში მზისკენ შოკოლადის ისრების წვიმა წამოვიდა.

უნდა გენახათ, როგორ გაოცდნენ, როცა მათმა სანაქებო ისრებმა მზის სხივების ქვეშ თვალსა და ხელს შუა დაიწყო დნობა, თუმცა ჯერ სად იყვნენ... ისრებს სულ მალე ჯერ აბჯრები და მერე ცხენებიც მიჰყვა.



– ვაიმე, თავს ვუშველოთ, მზე ჩვენზე ძლიერი ყოფილა! – ერთმანეთს შესძახეს ცალკე სიცხისგან და ცალკე სიმწრისგან გაოფლილმა რაინდებმა და გაქცევა მოისურვეს, მაგრამ დნობაშეპარულებმა თავიანთი სამეფოსკენ მძიმე-მძიმედ გალოღება ძლივსლა მოახერხეს.

– თავისი ბაქიბუქით სირცხვილიც ჭამეს! – თათი თათს შემოჰკრა ბაჭიამ.

– ნეტა, შენ რა გიხარია? ლაფისროლიამ რა დღეში ჩაგაგდო, არ გახსოვს?

– ხმა გაკმინდე, ენაჭარტალა კაჭკაჭო! – ბაჭიამ კენჭი ესროლა, მაგრამ მოქნილმა კაჭკაჭმა იოლად აიციდინა.

– ახლა გავჩუმდები, რახან ძალიან გვიანია, მაგრამ შემდეგი შეხვედრისთვის ზღაპრად ქცეული შენი ამბის მოყოლა, ბაჭიავ, იცოდე, ჩემზეა!

– ეჰ, სხვის ჭირზე რა მაცინებდაო, – ბაჭიამ ენაზე იკბინა, მაგრამ, კაჭკაჭის თქმისა არ იყოს, უკვე ძალიან გვიანი იყო.



მხატვარი მარია ღვინია





ოსკარ შმერლინგი

„დავიბადე ჩემი საყვარელი მხარის საუბედუროდ 1863 წლის 1 ივლისს, ცალ ხელში კარანდაშით, ხოლო მეორეში – მათრახით“ – ასე, იუმორნარევი მეტაფორებით იწყებს თხრობას საკუთარი თავის

შესახებ ქართული დაზგური გრაფიკის ერთ-ერთი ყველაზე გამორჩეული წარმომადგენელი, ქართული პლაკატისა და კარიკატურის ფუძემდებელი ოსკარ შმერლინგი. წარმომავლობით გერმანელი, თუმცა კი საქართველოს მკვიდრი მხატვარი, XIX-XX სს-ის მიჯნაზე თბილისში არსებულ თითქმის ყველა პერიოდულ გამოცემასთან თანამშრომლობდა, აფორმებდა წიგნებს და ქმნიდა პლაკატებს. მისეული ილუსტრაციებით გაიცნო, მიიღო და შეითვისა პირველად ქართველმა საზოგადოებამ იაკობ გოგებაშვილის „დედა ენა“ (1895), „თავდადებულნი ქართველნი“ (1895), „იავნანამ რა ჰქმნა?“ (1904), მისი ნახატი გმირები მეგზურობას უწევდნენ პატარებს ქართული ხალხური ზღაპრების ხიფათიან სამყაროში (1905). ოსკარ შმერლინგი იყო ქართული საბავშვო-საყმაწვილო ჟურნალ „ნაკადულის“ ერთ-ერთი დამფუძნებელი და მხატვარი. ამ ჟურნალს მოგვიანებით „ოქტომბრელის“, შემდგომ კი უკვე „დილის“ სახელით იცნობს ქართველი მკითხველი. სწორედ ოსკარ შმერლინგის მონდომებითა და ოსტატობით „შეიმოსა“ ეს საბავშვო გამოცემა ფერადი ყდით უკვე 20-

იანი წლების დამდეგს – მაშინ, როცა ბეჭდური საქმე მთელ საქართველოში მხოლოდ შავთეთრი იყო. მხატვარი სიცოცხლის ბოლომდე უწყვეტად თანამშრომლობდა ამ ჟურნალთან.

დღეს ქართველი საზოგადოება ამ მხატვარს უფრო ძველი თბილისის ყოფის ამსახველი ნამუშევრებით იცნობს. ფრაგმენტები კინტოებისა თუ ყარაჩოლელების ცხოვრებიდან, თბილისელი დიდებულები, ვაჭრები და სოფდაგრები, მეარღნეები და უბრალოდ მოქიეფენი, გამორჩეულად თვალშისაცემი კოლორიტი და უკვე წარსულის კუთვნილებად ქცეული თბილისური განუმეორებლობის ხიბლი – ასეთია ოსკარ შმერლინგის მხატვრული სამყარო.


ხატვა ბავშვობიდან იტაცებდა, ამიტომაც წერს ავტობიოგრაფიაში, ხელში „კარანდაშით“, ფანქრით დავიბადეო. ოღონდ მათემატიკას ვერაფრით აულო ალლო. არადა, იმხანად თბილისის რეალურ სასწავლებელში, სადაც ოსკარ შმერლინგი სწავლობდა, ყველაფერს ამ საგნის ცოდნა-არცოდნა წყვეტდა, წარმოიდგინეთ და, თვით გალობის ნიშანსაც კი. ჰოდა, მეხუთე კლასამდე ძლივს მიაღწია და მერე „დასასვენებლად“ სამი წლით შეეყოვნდა, სამი წლით ჩატოვებს სასწავლებლის მეხუთე კლასში. არადა, ეს ყველაფერი მხოლოდ მათემატიკის გამო... უამრავი დრო გამოუთავისუფლდა და მანაც სარედაქციო-გამომცემლობით საქმეს მიჰყო ხელი. დააარსა ჟურნალი „კოლო“, საკუთარი ძალებით გამოსცა მისი სამი ნომერი. როგორც მოსალოდნელი იყო, ჟურნალი მალევე დამრიგებლის რისხვამ



ნაკადული, 1905 წ. N15



ნაკადული, 1905 წ. N6





ნაკადული, 1906 წ. N8

იმსხვერპლა – შმერლინგი ხომ ძირითადად სასწავლებელში მიმდინარე პროცესებზე წერდა. მართალია, „კოლო“ აღარ არსებობდა, სამაგიეროდ, ახალგაზრდა შმერლინგმა უკვე იცოდა, რა იტაცებდა, რა სურდა და რისი შესწავლისთვის არ დაიშურებდა ძალებს. გაუჩერებლად ხატავდა და სხვადასხვა ჟურნალში აბარებდა თავის ნამუშევრებს. მისთვის თანდათან აშკარა გახდა, რომ პროფესიული დაოსტატება უმთავრესი იყო და სწავლა ჯერ პეტერბურგის სამხატვრო აკადემიაში, შემდეგ კი, გერმანიაში – მიუნხენის სამხატვრო სასწავლებელში განაგრძო. ოცნება სინამდვილედ იქცა. წარმატებით ჩაბარებული გამოცდების შემდეგ საქართველოში დაბრუნებულმა მხატვარმა კავკასიის კაზმულ ხელოვნებათა წამახალისებელი საზოგადოების ფერწერისა და ქანდაკების სკოლა დააარსა და თავადვე ჩაუდგა სათავეში. სულ მალე თბილისის სამხატვრო აკადემიის ერთ-ერთი პირველი პროფესორი გახდა. პერიოდულ გამოცემებთან თანამშრომლობა არასდროს შეუწყვეტია. მისი კარიკატურები არავის ტოვებდა გულგრილს, განსაკუთრებით კი პოლიტიკური კარიკატურები. უფრო მეტიც, პირველი ქართული იუმორისტული ჟურნალი „ემმაკის მათრახი“, უმთავრესად, სწორედ მისი ილუსტრაციებით გამოდიოდა. აი, პასუხი კიდევ ერთ მეტაფორაზე – დაბადებისას მეორე ხელში მათრახი მეჭირაო.

აბა, მაშინ ვინ იფიქრებდა, რომ ეს სწორედ ის ბიჭუნა იყო, მათემატიკის გამო მეხუთე კლასში სამი წელი რომ სწავლობდა?..

1. ჟურნალი, რომელიც სწავლის პერიოდში თავად შექმნა ოსკარ შმერლინგმა;
2. რამდენი წელი სწავლობდა შმერლინგი მეხუთე კლასში?
3. სატირულ-იუმორისტული შინაარსის ნახატი;
4. სასწავლო საგანი, რომელიც შმერლინგს არ უყვარდა;
5. ევროპის ქვეყანა, სადაც ოსკარ შმერლინგი პროფესიული განათლების მისაღებად გაემგზავრა;
6. ჟურნალ „ნაკადულის“ ამჟამინდელი სახელწოდება;





ჟურნალ „დილას“ 2013 წელს მიენიჭა არამატერიალური
კულტურული მემკვიდრეობის ძეგლის სტატუსი

მთავარი რედაქტორი: დოქტორი ნინო ნიკიფიძე
ნახატი ყდაზე: გიორგი მაღრაძისა
მის.: ზანდუკელის ქ. 1, ტელ.: 2 93 69 77
<http://www.dila.ge>, ელ-ფოსტა: dila1904@yahoo.com,
facebook: საბავშვო გამომცემლობა დილა
ფასი: 2.50 ლარი



ჟურნალი გამოდის საქართველოს კულტურისა და ძეგლთა დაცვის სამინისტროსა
და სსიპ „მწერალთა სახლის“ მხარდაჭერით.



საქართველოს კულტურისა
და ძეგლთა დაცვის
სამინისტრო